

氏族典第二百七十四卷

王姓部列傳二十二

明一 王溥

按明外史王溥傳溥安仁人仕陳友諒爲平章守建昌太祖征漢拔江州友諒敗走溥遂降命仍守建昌進中書右丞洪武元年從大將軍北伐屢有戰功擢河南行省平章初溥未仕時奉其母葉避兵貴溪遇亂與母相失凡十八年溥嘗夢母若告以所在者及是請歸省墳墓許之溥歸之貴溪桃源山求不得晝夜號泣者三日居人吳海言夫人爲賊逼投井中死矣溥求得井索之母屍果在哀呼不自勝卽其地葬之溥卒子孫世襲指揮同知

王宗顯

按明外史王宗顯傳宗顯和州人僑居嚴州胡大海克嚴禮遇之及攻婺不克太祖親視師蘭谿大海以宗顯見因命至婺覘賊宗顯潛得城中虛實還白太祖太祖甚喜城下改婺州爲寧越府以宗顯知府事卒官

古今圖書集成
王興宗

按明外史王宗顯傳太祖之下婺也又以王興宗爲金華知縣興宗故隸人也居三年以治行聞遷判南昌改知嵩州僉院遷懷慶知府上計至京蘇州缺知府帝曰王興宗可在蘇三載盛有政聲擢河南布政使益勤其職卒於官

王佑

按明外史胡子祺傳與子祺同爲廣西僉事者有泰和王佑徙知重慶州招徠撫輯甚得民和坐事免官卒

王冕

按明外史王冕傳冕字元章諸暨人幼貧父使牧牛竊入學會聽諸生誦書暮乃返忘其牛父怒撻之已而復然母曰兒癡如此曷不聽其所爲冕因去依僧寺讀書會稽韓性聞而異之錄爲弟子遂稱通儒太祖下婺州物色得之置幕府授諮議叅軍一夕病卒

王逢

按明外史戴良傳王逢字原吉江陰人至正中作河清頌臺臣薦之稱疾辭張士誠據吳其弟士德用逢策北降於元以拒明太祖滅士誠欲辟用之堅臥不起隱居上海之烏涇歌詠自適卒年七十有梧溪詩集逢自稱蓆帽山人

王佐

按明外史孫贇傳王佐字彥舉先河東人元末侍父官南雄經亂不能歸遂占籍南海與贇結詩社構辭敏捷洪武六年被薦徵爲給事中性不樂樞要乞骸歸

王蒙

按明外史王蒙傳蒙字叔明湖州人趙孟頫之甥也敏於文工畫山水人物元末官理問遇亂隱居黃鶴山自稱黃鶴山樵洪武初知泰安州事蒙嘗謁胡惟庸於私第惟庸伏法蒙坐事被逮瘐死

王愷

子行

按明外史王愷傳愷字用和當塗人通經史元時爲府吏太祖拔太平召愷爲掾及建中書省用爲都事太祖克婺州置中書分省愷爲都事克衢州命總制軍民事守金華尋遷左右司郎中佐胡大

古今圖書集成
海治省事苗軍作亂害大海執愷欲降之愷正色曰吾守土義當死寧從賊耶賊遂并其子行殺之
追封當塗縣男

王禕

按明外史王禕傳禕字子充義烏人幼敏慧長以文章名太祖取婺州召見用爲中書分省掾史太祖創禮賢館李文忠薦禕召置館中旋授江南儒學提舉校理父憂歸服闋除侍禮郎尋掌起居注已命同知南康府事居官有惠政太祖將卽大位召還議禮坐事忤旨出爲漳州府通判修元史命禕爲總裁書成擢翰林待制同知制誥坐失朝降編修洪武五年太祖旣平蜀議招諭雲南會北平送雲南使者蘇成至乃元梁王把匝剌瓦爾密遣往漠北者卽命禕齎詔偕往至則諭王以禍福王未決而元嗣君遣使脫脫徵餉脅王以危言必欲殺禕王匿禕民間脫脫誚讓王王不得已出禕見之脫脫欲屈禕禕叱之遂遇害

王履

按明外史王履傳履字安道崑山人學醫于金華朱彥修盡得其術工詩文兼善繪事履元末人至

明初卒

王紱

按名山藏藝妙記紱字孟端號友石又號九龍山人高介絕俗沐黔公行金帛乞畫謝絕之後忽作一幅遺其所厚同官轉致之曰姑以是塞黔公意無言我爲公也月夜聞鄰笛乘興畫幅竹訪遺之人乃大賈喜甚與絳綺各二更求配幅紱却其幣手裂畫壞之紱有詩集行世王世貞稱紱畫竹爲國朝第一

王景

按明外史張統傳王景字景彰松陽人洪武初爲懷遠教諭以博學應詔累官山西右參政坐事謫雲南建文中召入翰林修太祖實錄以張統薦除禮部侍郎兼翰林侍講成祖卽位擢學士永樂六年卒於官

王行

按明外史王行傳行字止仲吳縣人淹貫經史百家言洪武初有司延爲學校師已謝去隱於石湖

古今圖書集成
其二子役於京行往視之涼國公藍玉館于家數薦之太祖得召見後玉誅行父子亦坐死

王珪

按萬姓統譜珪合肥人慷慨有大志少爲淮西廉訪司隸卒見官長儀衛尊崇輒慨然嘆曰將相無種在人爲耳元末兵亂募集鄉民守廬州自稱萬戶尋來歸從征渡江克復太平仍命爲萬戶守之積功陞右軍都督僉事

王撰

按萬姓統譜撰祥符人仕元爲國子助教洪武初召授翰林修撰兼編修官命於大本堂授經遷待制致仕子弘爲龍江遞運所官爲丞相胡惟庸家人所懇實於法惟庸敗召撰父子至京慰勞賜綺帛給舟車還家

王釐

按萬姓統譜釐鄱陽人自少穎敏博學能文洪武初以明經授鄱陽教諭多造就人才召爲翰林院編修與修國史每備顧問奏對稱旨嘗患頭風上以所御藥酒飲之遂愈後乞外補命知南陽府有

善政以疾卒所著有羣英雜言詩粹若干卷

王公懋

按萬姓統譜公懋洪武初爲高苑縣丞時有強賊數十人入高苑劫掠民不能禦公懋率民兵捕之賊拒敵斫公懋左耳公懋不爲動擊殺二人餘皆擒之事聞賞綺帛以旌之

王博

按萬姓統譜博洪武初開封知府時流移新復反覆未定博寬其徭役禁其侵攘教民闢土地藝蠶桑期年之間民獲其利遂安生理

王彝

按萬姓統譜彝字常宗其先蜀人父允教授崑山州學遂占籍嘉定彝博學強記文尤嚴整洪武初與郡人高啟謝徵輩交善被詔同修元史史成授以官不就而歸時江夏魏觀守郡賓禮賢士未幾以事被逮彝與啟嘗爲觀作文竟連坐死于京市有王常宗集行于世

王紹原

古今圖書集成
按萬姓統譜紹原字復初幼嗜學治毛詩刻意吟詠伯仲五人值元季兵興經亂離家以傾廢紹原
惟守淡苦諸弟欲求分異以自便紹原不能已推產與之惟取先世墓田以供祭祀及海內平於所
居之旁闢一軒扁曰耕讀與常所往來觴咏自娛灑然無世累有耕讀集傳於家

王沂

按萬姓統譜沂泰和人博通諸經元季一試有司不合不復出洪武初徵爲說書上書論事授福建
鹽運副使以老罷歸弟祐爲監察御史陞廣東按察僉事風槩凜然

王勝

按安慶府志勝桐城人喜讀書尤好兵法元末歸明太祖立功官右副元帥後攻陳友諒取江州鄱
陽之戰謀欲火攻詐降夜焚其營乘火奪擊大被之勝死于火封太原郡侯祀康郎山

王鼎

按揚州府志鼎儀真人爲趙忠養子明初忠渡江從征有功沒於陣鼎襲其職復姓王命守太平陳
友諒以兵來犯鼎與花雲竭力堅守城陷鼎罵賊不屈死之追封太原郡侯

王貞

按江陰縣志貞本壽州人洪武初以武功累官廣西都指揮使在鎮軍民輯睦號稱職卒贈都督同知追封臨沂侯諡恆義

王道同

按明外史孫炎傳苗軍作亂執炎及知府王道同元帥朱文剛幽空室脅降皆不屈見害道同由中書省宣使還帳前總管出爲義烏知縣擢知處州贈太原郡侯

王本

按明外史安然傳太祖罷中書省散其職掌於六部詔天下舉賢才戶部尙書范敏薦耆儒王本等召至告之太廟以本爲春官命協贊政事居無何致仕後坐事誅本不詳其籍里

王濂

按明外史孔克仁傳王濂字習古定遠人少嗜學事親孝初爲縣吏汝潁兵起往說其帥留爲萬夫長累官工部尙書聞太祖克集慶渡江來歸除執法官讞獄平允遷中書省員外郎出爲浙江按察

古今圖書集成
人事典
僉事治行著聞洪武三年卒

王志

按名山藏勳封記六安侯王志鳳陽人從渡江克定太平溧陽建業京口毗陵宣城江陰安慶江州南昌湖廣廬安豐從宋國公渡河取懷慶澤潞深入察罕腦兒絕塞却敵洪武三年授開國輔運推誠宣力武臣榮祿大夫柱國同知大都督府事侯食九百石賜誥券與誓身免二死子一死侯十七年卒贈許國公子諡二十二年威嗣二十三年坐林來保事謫安南衛指揮亡子志次子域嗣改清平衛世官胡黨覺志以死前免竟除

王文淵

按萬姓統譜文淵字巨卿自幼失怙能自樹立善推擇爲吏厭而棄之從學于滕安上益日克勵遂淹貫經史色養事親友弟訓子家庭之間肅如也作詩紆徐冲澹得韋孟體爲當代名公雅重竟不仕卒于家鄉人稱之曰貞孝先生

王忠信

按善化縣志忠信元末保障鄉閭民賴全活甲辰率衆歸附授鎮撫洪武三年率兵往克蘇州力戰而死

王銘

按明外史王銘傳銘字子敬和州人初隸元帥俞通海麾下數有功選充宿衛擢管軍百戶命守松江移太倉洪武四年進太倉衛管軍副千戶擢長淮衛指揮僉事移温州歷右軍都督僉事二十六年坐藍黨死

王升

按萬姓統譜升德清人洪武初坐事繫刑部獄時升子鎮爲平涼知縣升寄書戒鎮居官廉潔撫民仁慈報國忠勤處己謙敬買附子川椒經稅而後寄來獄吏得其書以聞朝廷嘉嘆下詔褒美賚白金百兩絹十匹附子五枚椒五斤免其所坐復其家

王桓

按萬姓統譜桓字彥珍慈谿人洪武四年有司以通經學古薦於朝太祖高皇帝召見便殿問桓處

鄉里好惡何如桓對曰善者好之不善者惡之一言稱旨上遂呼爲老學士乃命與尙書魏杞山錢惟明學士宋景濂輩講論治道踰年授國子學正未幾轉河南盧氏縣令政教一新民懷其德十二年致仕盧人立祠祀之先是桓家居鄉人有不平事無大小咸取決於桓無不得其情者遂稱爲明白先生其所學不事章句務得於心識者謂其克繼虞賀杜樓之絕學所著有明白先生集藏于家桓以孫成貴贈都察院右都御史大理寺卿

王綱

按明外史王綱傳綱字性常餘姚人與弟秉常敬常並以文學名綱善劉基基薦綱于太祖洪武四年徵至京師太祖策以治道擢兵部郎潮民弗靖除廣東叅議督兵餉諭降諸亂民還抵增城遇海寇曹真截舟羅拜願得爲帥不從奮罵不絕口遇害

王省

按明外史周是修傳王省字子職吉水人洪武五年領鄉舉至京詔免會試命吏部授官省言親老乞歸養尋以文學徵授浮梁教諭凡三爲教官最後得濟陽燕兵至爲游兵所執從容引譬詞義慷慨

慨衆舍省省歸坐明倫堂大哭以頭觸柱死福王時諡貞烈

王洵 王淳

按吳縣志洵淳父鑄辟爲都督府斷事洪武八年坐法當死洵兄弟日夜號泣爭詣御史請代兄弟交讓御史疏於朝鑄得免死

王賓

按萬姓統譜賓字用賓鄞人少卓犖不羣甫長博學強記貫穿經史百家避地村疇澹然自適號水村隱者洪武六年舉茂才以母老不起既終養復以文學薦授休寧教諭身率諸生矻矻忘寢食士不懲自勸秩滿考績廷試鍾山雨齋賦及鰲鶴賦上奇之命供奉翰林以老辭教授潯郡卒門人私諡曰清節先生祠於學所著有書隱西上南游等集

王燾

按明外史鄭濂傳王燾蘄水人七世同居一家二百餘口人無間言洪武九年詔旌爲孝義之門

王弼

古今圖書集成
按名山藏勲封記定遠侯王弼定遠人鳩義兵附人名其能曰雙刀王累功都督僉事世指揮以副將軍從西平侯討平西蕃洮州戎洪武十二年授開國輔運推誠宣力武臣榮祿大夫柱國侯祿二千石世指揮使賜券與誓身免二死從潁川侯討平雲南十七年使世益祿五百石十一年卒竟除

王興

按沂州志興沂州衛中所千戶驍勇過人忠義天植洪武十三年城西艾山有黑虎爲害興操挺入其穴獨力扼吭相鬪竟與虎俱斃居民感其功立祠山麓間四時蒸嘗不絕

王子覺

子麟 子偉 應 勲

按明外史鄭濂傳王燾生三子子覺子麟子偉子覺生應子偉生勲子覺承父志同居無間言洪武十四年太祖旣擢用義門鄭湜因令湜舉所知以應應詔擢布政司叅議二十六年簡東宮官又擢應從弟勲右庶子義門王氏之名遂與鄭氏並

王伯貞

按明外史王直傳直父伯貞以經術顯洪武十五年聘至京帝應詔者五百餘人帝親御奉天門試

之伯貞對第一授試僉事分巡廣東雷州召還爲戶部主事以父喪服闋不時起謫居安慶者數年建文初復以薦知瓊州府憂歸未之官卒

王鈍

按明外史張統傳王鈍字士魯太康人元至正間進士洪武中徵授禮部主事歷吏部郎中出爲福建左叅議轉右叅政以廉慎聞遷浙江左布政使在浙十年名與張統埒建文初拜戶部尙書燕兵入京師踰城走爲邏卒所執成祖卽位命仍故官未幾與統俱罷歸鬱鬱死

王朴

按明外史王朴傳朴同州人洪武十八年進士本名權帝爲改焉除吏科給事中以直諫忤旨罷旋起御史性鯁直數與帝辨是非不肯屈一日遇事爭之彊帝怒竟戮死

王觀

按明外史王觀傳觀字尙賓祥符人性耿介儀度英偉善談論由鄉薦入太學擢知蘇州府公廉有威發奸摘伏民憚若神太祖嘉其能以觀榜勵天下

王興福

按明外史王觀傳杭守王興福以治郡名興福隨人初守徽州有善政遷杭州杭初附人心未安興福善撫輯寬簡不苛民甚德之秩滿當遷郡人遮道攀留太祖嘉之擢吏部尙書坐事左遷西安知府卒官

王士弘

按明外史盧熊傳王士弘知寧海縣靖海侯吳楨奉旨收方氏故卒無賴子誣引平民台溫明爲之騷然士弘條上封事辭極懇切詔罷之三府以安

王彰

按明外史王彰傳彰字文昭鄭人洪武二十年舉于鄉補國子生使山東平糴以廉幹稱擢吏科源士踰年革源士改給事中遷都給事中改刑部員外郎遷山西左叅政永樂五年召爲禮部右侍郎父喪除改戶部奉使祀西嶽還改都察院右副都御史久之進右都御史宣德三年卒于官彰嚴介自持請託皆絕用法過刻時劉觀爲左都御史人謂彰公而不恕觀私而不刻云